

Naqqiut 2

Naqqiut 21. september 2017-imeersoq taarserpaa.

(Immikkoortoq 1-imi Nassuiaatit nalinginnaasut allannguuteqarput (nassuiaatit erseqqissaatiginerat), immikkoortoq 3 (aningaasaqarnikkut kingunerisa erseqqissaatiginerat), immikkoortoq 8 (tusarniaanermut immikkoortumi kingunerinik naqqiinerit) kiisalu § 1, nr. 1, 3, 4, aamma 5-imut nassuiaatit ataasiakkaat (siunnersuummi allannguutit kingunerannik nassuiaatinut naqqiutit), § 2 nr. 1, nr. 2 og nr. 3, § 3, nr. 1 (siunnersuummi allanngutit kingunerannik nassuiaatinut naqqiutit) naqqiivigineqarput)).

Siunnersuummut nassuiaatit

Nassuiaatit nalinginnaasut

1. Aallaqqaasiut

Isumaginnittoqarfiup aqunneqarnera aqqissuussaanelu pillugit Inatsisartut peqqussutaata (kingornatigut taaneqartartussap: isumaginnittoqarfik pillugu peqqussut) nr. 11-ip 12. novembari 2001-imeersup allannguutissaanik Inatsisartut inatsisissaanik siunnersuutikkut matumuuna Isumaginninnermi Naammagittaalliuuteqartarfik allannguutitigut suliniutitigullu arlalitsigut nutarsarneqassaaq.

Sinnersuummi ataatsimut isigalugu siunertarineqarpoq isumaginninnermik sullissinnermi naammagittaalliuuteqartarnermi naammassisaqarnerunissaq aamma inatsisitigut isumannaatsuunerup annertunerunissaa, taakku ataanni sulianik suliarinninnerup sivikillineqarnissaa.

Atuisoqarnermut Unammilleqatigiinnermullu Aqutsisoqarfiup Isumaginninnermi Naammagittaalliuuteqartarfik suleqatigalugu missuinerit arlallit ingerlassimasaat aamma maleruagassat massakut atuuttut tunngavigalugit allaffissornermi misilittakkat siunnersuummut matumunnga tunngaviupput. Tamatumunnga atatillugu paasineqarpoq naammagittaalliuuteqartarnermi massakut atuuttumi arlalitsigut naleqqutinngitsoqartoq sullissinerup sivitsorneqarneranik innuttaasullu inatsisitigut isumannaatsuunissaasa annikillisisinneqarnerannik kinguneqartunik. Naleqqutinngitsut ilaat ukiuni kingullerni Isumaginninnermi Naammagittaalliuuteqartarfiup ukiumoortumik nalunaarusiaani allaaserineqarput.

Naleqqutinngitsut ilaat ataaseq tassaavoq Isumaginninnermi Naammagittaalliuuteqartarfiup kommuninit allagaatinik piniarnera sivisuallaartarmat, tassami kommunit tassaammata isumaginninnermi oqartussaasutut siullertut suliarinnittartut aalajangiisartullu.

Pingaartumik pisortanit ikiorsiissutit, siusinaartumik pensionisiaqarneq utoqqalinersiuteqarnerlu pillugit sammisani kisitsisit atorlugit nassuiaasiorluni misissuinnermi paasineqarpoq agguaqatigiissillugu ullut 140-150 missaanni ingerlasartut Isumaginninnermi Naammagittaalliuuteqartarfiup allagaatinik piumalluni saaffiginninneraniit kommunit allagaatinik Isumaginninnermi Naammagittaalliuuteqartarfimmut nassiussinerannut. Ilutigalugulu paasineqarpoq allagaatinik piniarnermi piffissaq atorneqartoq suliamiit suliambut nikerarsinnaaqisoq.

Taamaattumik ajornartorsiut tamanna inatsisissatut siunnersuutikkut iliuuseqarfiginiarneqarpoq, suliami allagaatinik nassiussinissamut kommunit sapaatit akunnerinik 4-nik piffissalernerisigut.

Inatsisissatut siunnersuutip siunertarivaattaaq Isumaginninnermi Naammagittaalliuuteqartarfiup sularinnittarnera pitsanngorsassallugu inuuttaasut sullinneqarnerat sukkanerusumik ingerlasalerniassammat innuttaasunut iluaqutaasumik. Isumaginninnermi Naammagittaalliuuteqartarfimmi sularinnittarnerit pitsanngorsarnerisigut kommunit akissuteqarnissamut piffissaq atugaat sivisoorsuusinnaasoq Isumaginninnermi Naammagittaalliuuteqartarfimmi sularinninnermi sivitsorsaataassanngilaq.

Inunnik Isumaginninnermi Naammagittaalliuuteqartarfimmut suliassanngortinneqartut qanoq iluseqarnissaannik piumasaqaatinik aalajangersaasinnaalernerumut periarfissiinerup suliat sularineqartarnerisa pisariinnerulersinneqarnissaat nutarteriffigineqarnissaallu inatsisissatut siunnersuutikkut siunertarineqarportaaq. Tamanna pingaartumik aallaqqaataaniit isumannaannerusumik paasissutissanik tunngaveqarnissamut iluaqutaassaaq.

Isumaginninnermi Naammagittaalliuuteqartarfimmi sullivanik sularinninnerup oqilisarneratigut, maanna qaammatini kingullerni 12-ini piffissap sullivanik sularinninnermut atorneqartartup agguaqatigiissillugu qaammatinik 16-inik sivisussuseqartartup sivikillinissaanik suliaq ingerlaqqissinnaassaaq. Piffissaq sullivanik sularinninnermut atorneqartartoq 2008-miilli sivikilliarforsimavoq, ukiunili kingullerni suliat takkuttartut amerlinerat pissutigalugu, 2015-imisut suliat sularinerinut agguaqatigiissillugu qaammatinit 11-init sivikinnerunissaa suli anguneqanngilaq. Sulianik sularinninnermut agguaqatigiissillugu piffissap 2015-imit sivikinneroqqilernissaanut inatsisissatut siunnersuut tapertaassaaq.

2. Siunnersuummi immikkoortut pingaarnerit

2.1 Naammagittaalliuuteqarnermi suliassap ingerlanneqarnera

2.1.1 Inatsisit atuuttut

Isumaginnittoqarfik pillugu peqqussummi atuuttumi § 8, imm. 1-imi aalajangersarneqarpoq kommunalbestyrelsip aalajangigai isumaginnittoqarfimmi malittarisassat malillugit Isumaginninnermi Naammagittaalliuuteqartarfimmut suliassanngortinneqarsinnaasut. Naammagittaalliuut suliambut attuumassuteqartumit suliassanngortinneqassaaq aalajangiinerup kingornatigut sapaatip akunneri 4-t qaangiutsinnagit. Kommunip aalajangigai tamarmik

aalajangersakkami pineqarput, kommunalbestyrelse sinnerlugu suliame pineqartumi aalajangiinerup sularineqarnera politikikkut allaffissornikkulluunniit pisimansoq apeqqutaatinnagu.

§ 8 imm. 2-mi aalajangerneqarpoq isumaginninnikkut malittarisassat naapertorlugit Naalakkersuisut aalajangiisimatillugit aalajangiineq Isumaginninnermi Naammagittaalliuuteqartarfimmut naammagittaalliuutigineqarsinnaavoq. Naammagittaalliuut aalajangiinerup tiguneqarneranit suliame attuumassuteqartumit sapaatit akunneri 4-t qaangiutsinnagit naammagittaalliuutigineqassaaq. Tamannali atuutinngilaq Naalakkersuisut allaffissornikkut aalajangigaata naammagittaalliuutigineqarsinnaannginneranik inatsisimmi immikkut aalajangersaasoqarsimatillugu.

Naammagittaalliuut oqartussaasutut sularinnittuusimasumut siullermut aalajangiisimasumut tunniunneqarpat ingerlatsineri inatsisitigut malittarisassat nalinginnaasut malillugit oqartussat pisussaataapput suliame aallarteqqissallugu imaluunniit naammagittaalliuut Isumaginninnermi Naammagittaalliuuteqartarfimmut ingerlateqqissallugu, tak. Pisortat ingerlatsineranni suliassat sularineqartarnerat pillugu Inatsisartut inatsisaanni § 7, imm. 2.

Ingerlatsineri inatsisitigut malittarisassat nalinginnaasut malillugit Isumaginninnermi Naammagittaalliuuteqartarfimmut naammagittaalliuut aalajangikkap atorunnaarallarneranik kinguneqassanngitsoq aallaaviussaaq. Taamaattumik aallaavittut suliame attuumassuteqartup naammagittaalliuutip Isumaginninnermi Naammagittaalliuuteqartarfiup sularineqarnerata nalaani kommunimit imaluunniit Naalakkersuisunit aalajangigaq malissavaa. Pisuni immikkut ittuni Isumaginninnermit Naammagittaalliuuteqartarfiup allakkat tunngavigalugit naammagittaalliuutip kinguartitsinermik kinguneqarnissaa aalajangersinnaavaa, periarfissarli taanna suleriaatsimi atorneqartanngilaq.

2.1.2 Aaqqissuussineq siunnersuutaasoq

§ 8-tut siunnersuutigineqartumi aalajangiinerit kommuninitt Naalakkersuisunilluunniit aalajangiiffigineqarsimasut naammagittaalliuuteqarnerini malittarisassat pingaarutilinni ingerlateqqinneqarput, tassa imaalerluni kommunit imaluunniit Naalakkersuisut aalajangigaat pillugit naammagittaalliuuteqarnermi malittarisassat assigiissarneqartut aalajangersakkanilu ataatsimoortuni katersorneqarlutik.

§ 8, imm. 2-tut siunnersuutigineqartumi Isumaginninnermi Naammagittaalliuuteqartarfiup aalajangigai allaffissornikkut oqartussanut allanut ingerlateqqinneqarsinnaanngitsut aalajangerneqarpoq.

Isumaginninnermi Naammagittaalliuuteqartarfiup aalajangigai suli Eqqartuussiveqarfimmut ingerlateqqinneqarsinnaapput aamma Inatsisartut Ombudsmandiannut naammagittaalliuutigineqarsinnaallutik. § 8, imm. 3-tut siunnersuutigineqartumi

ingerlateqqinneqarpoq suliat meeqqanut inuusuttunullu 18-it inorlugit ukiulinnut angajoqqaatut oqartussaassuseqartoq meerarlunniit akuersiteqqaarnagu angerlarsimaffiup avataanut inissinneqarsimasunut tunngasut pillugit Kalaallit Nunaanni Eqqartuussiveqarfimmut tunniunneqarsinnaasut. Kiisalu meeqqap pisinnaatitaaffigilerpaa Isumaginninnermi Naammagittaalliuuteqartarfiup aalajangiinera Kalaallit Nunaanni Eqqartuussiveqarfimmut ingerlateqqissinnaallugu.

Naammagittaalliuuteqarnissamut piffissarititaasoq sapaatit akunnerinut arfinilinnut sivitsorneqarpoq. Naammagittaalliornissamut piffissarititaasoq aalajangikkanut Isumaginninnermi Naammagittaalliuuteqartarfiimmut suliaassiisutiginenartunut atuuppoq. Siunnersuutigineqartumi § 8, imm. 5 naapertorlugu piffissaliussap malinneqannginnera isiginnginniarneqarsinnaavoq pineqartoq qaangiinnermut akisussaatinneqarsinnaanngippat.

2.2 Isumaginninnermi Naammagittaalliuuteqartarfik

2.2.1. Inatsisit atuuttut

Isumaginnittoqarfik pillugu peqqussummi malittarisassat malillugit Isumaginninnermi Naammagittaalliuuteqartarfik isumaginninnermi malittarisassat malillugit aalajangiinernik naammagittaalliuuteqarnermi oqartussaavoq. Isumaginninnermi Naammagittaalliuuteqartarfiup piginnaatitaaffiisa sannai aalajangersakkani atuuttuni §§ 10-11-ini erserput. Kiisalu § 9, imm. 3-p malitsigisaaanik Naalakkersuisut Isumaginninnermi Naammagittaalliuuteqartarfiup suleriaasissaa aalajangersassavaat.

Isumaginninnermi Naammagittaalliuuteqartarfik aalajangiisinnaassuseqartarpoq ilaasortat ikinnerpaamik 3-t najuukkaangata, tak. § 10, imm. 1, imm.1. Amerlanerussuteqarnikkut aalajangiisooqartassaaq, tak. § 10, imm. 1, imm. 2. aamma 3. § 9, imm. 3 naapertorlugu inuit suliamut tunngasunik immikkut ilisimasaqartut aggersakkat taasisinnaatitaanngillat.

Illersorneqarsinnaasumik tunngavissaqarsimappat, aammalu aalajangiinissaq nalorninaateqanngippat siulittaasoq ataatsimiinnermi saqqummiussisoqanngikkaluartoq suliassamik § 10, imm. 3 naapertorlugu aalajangiisinnaavoq. Taamaattoqassappat siulittaasup ilaasortat sinneri ilisimatissavai. Siulittaasup § 10, imm. 3 naapertorlugu siulittaasutut oqartussaaffini tamakkiisumik ilaannakortumillunniit Isumaginninnermi Naammagittaalliuuteqartarfiup allattoqarfianut tunniussinnaavai, tak. § 11. Piffissami 2009-2015-imi siulittaasup aalajangigaasa amerlassusaat aalajangikkanut tamanut naleqqiullugit agguaqatigiissillugu 22 procentiupput.

2.2.2 Aaqqissuussineq siunnersuutigineqartoq

§ 9-tut siunnersuutigineqartumi Isumaginninnermi Naammagittaalliuuteqartarfiup ilaasortai 5-iniit 3-nut ikilisinneqarput. Siulittaasoq naammagittaalliuuteqartarfiimmi pisortatut atorfinitsinneqassaaq. Naammagittaalliuuteqartarfiimmi pisortaq inatsisilerituutut soraarummeersimassaaq. Ilaasortaataasut allat marluk aappaa inatsisilerinermik aappaa isumaginninnermik

tunuliaqutaqassapput. Aamma allakkatigut taasisoqarneratigut aalajangiisoqarsinnaanerani pitsaannerusumik periarfissiisoqarpoq.

§ 10-tut siunnersuutaasumi suliani inatsisitigut Isumaginninnermi Naammagittaalliuuteqarfik naammagittaalliorfissaappat Isumaginninnermi Naammagittaalliuuteqartarfiup siulittaasua aalajangiisinaavoq. Siulittaasooq isumaqarpat suliaq tunngaviummik pingaaruteqartoq taava suliaq taanna Isumaginninnermi Naammagittaalliuuteqarfimmut saqqummiunneqassaaq imaluunniit allakkatigut aalajangigassanngortinneqarluni. Aalajangiinerit siulittaasumit aalajangerneqartussatut ilimagisat amerlassusaat aalajangigassat 75%-erissagaat ilimagineqarpoq.

Isumaginninnermi Naammagittaalliuuteqarfiup aamma allattoqarfiup suleriaasissaat aamma pisinnaatitaaffissaat pillugit malittarisassanik nalunaarutikkut aalajangersaanissamut Naalakkersuisut siunnersuummi aalajangersakkami § 9, imm. 8-mi piginnaatitaapput. Piginnaatitaanerup isumaginnittoqarfik pillugu peqqussummi aalajangersakkat itisilerpai. Isumaginninnermi Naammagittaalliuuteqartarfimmut aamma allattoqarfimmut suleriaatsip piginnaatitaaffiullu tungaasigut eqaatsunik sinaakkutissarititaqartitsinissaq matumani siunertarineqarpoq.

Naalakkersuisut nangittumik Isumaginninnermi Naammagittaalliuuteqartarfimmut allattoqarfeqartitsissapput, tak. § 9, imm. 9.

2.3 Naammagittaalliuutinik tunniussinnermi naammagittaalliuutit ilusissaannut piumasagaatit

2.3.1 Inatsisit atuuttut

Ingerlatsinnermi inatsisitigut tunngaviumsulit nalinginnaasut malitsigisaannik Isumaginninnermi Naammagittaalliuuteqarfimmut naammagittaalliuutip tunniunneqartup qanoq iluseqarnissaanut piumasagaartoqarsinnaanngilaq. Taamaalilluni naammagittaalliuut oqalunnikkut allattariarsorlunuunniit, taassuma ataani elektroniskimik assaannarmilluunniit allatamik, tunniunneqarsinnaavoq. Isumaginninnermi Naammagittaalliuuteqarfimmut elektroniskiummik Naammagittaalliuuteqartoqarsinnaavoq www.sullissivik.gl aqqutigalugu, misilittakkalli takutippaat naammagittaalliuuteqartut ilaannaminnguusa periarfissaq taanna atortaraat.

2.3.2 Aaqquissuussineq siunnersuutigineqartoq

Siunnersuutigineqartumi § 9, imm. 8-mi Naalakkersuisut piginnaatinneqarput isumaginninnermi malittarisassat malillugit aalajangikkat pillugit § 8, imm. 1 naapertorlugu naammagittaalliummik tunniussinnermi naammagittaalliuutip qanoq iluseqarnissaanik piumasagaateqarsinnaallutik. Naammagittaalliuutit qanoq iluseqarnissaanut piumasagaatit qanoq ittuunissaannut aamma suliat qanoq ittut ilusissatut piumasagaataasunut eqqortitsitsisinaanersut sukumiinerusumik malittarisassaliornissaannut piginnaatitsineq atorneqassaaq. Ilusissatut piumasarineqartuni pineqartuni ataaseq arlallilluunniit eqqortinneqarsimangippata aalajangerneqarsinnaavoq naammagittaalliuutit itigartitsissutigineqassaaq. Pisuni sukumiinerusumik taaneqartuni ilusissanik

eqqortitsinnginnermi qanoq ilisukkut isiginnginniartoqarsinnaanersoq pillugu aamma malittarisassiorqoqassaaq.

Ilaatigut qularnaarniarlugu Isumaginninnermi Naammagittaalliuuteqartarfimmit paasissutissat naammagittaalliuutip suliarinissaanut pisariaqartinneqartut tiguneqarnissaat aamma ilaatigut sulianik ingerlatsinnermi piffissap atorneqartup sivikillisarnissaa eqqarsaatigalugu, naammagittaalliuuteqarnermi suleriaatsip assigiissarneqarnissaa, ilusissanik piumasaaqateqartoqassasoq aalajangiinnermi siunertarineqarpoq. Tamanna ilaatigut qularnaarneqarsinnaavoq naammagittaalliuuteqartup piумаaffigineratigut naammagittaalliuuteqarnermi immersugassaq aalajangersimasoq atussagaa (immersuinissamut pisussaatitaaneq) aamma/imaluunniit naammagittaalliuuteqartut piумаaffigineqassasut naammagittaalliuut maskiinamik allatanngorlu tunniutissagaat, imaappoq assammik allataassanngitsoq. Tamatuma nutserinermik sulineq oqilisassavaa ilimagineqarlunilu suliamik ingerlatsinnermut piffissap atorneqartup sivikillinissaanik kinguneqassasoq.

Matumani naatsorsuutigineqassaaq oqartussat isumaginninnermi malittarisassanik ingerlatsisut naammagittaalliuuteqarniartunik pisariaqartumik ikiuissasut ilitsersuussinnermikkut ilusissatut piumasaaqatit eqqortinnissaat anguniarlugu. Taamaattumik Isumaginninnermi Naammagittaalliuuteqarfiup naammagittaalliuutit ilusissanik eqqortitsinngitsut pisuni tamani nangaanani itigartitsissutigisassanngilai. Taamaalilluni aalajangersakkat siunissami periarfissiipput Isumaginninnermi Naammagittaalliuuteqartarfimmut naammagittaalliuuteqartarnermi ingerlatsinerup tamakkiisumik imaluunniit ilaannakortumik digitalinngorsagaanissaanut.

Siunnersuut Inatsisartut peqqussutaannut atuuttumut naleqqiullugu	
Inatsimmi atuuttumi oqaasertat	Inatsisissatut siunnersuummi
<p>§ 8. Isumaginninnermi malittarisassat naapertorlugit kommunalbestyrelsi aalajangiisimatillugu suliamut attuumassuteqartup aalajangiineq Isumaginninnermi Naammagittaalliuuteqartarfimmut naammagittaalliuutigisinnaavaa. Aalajangiinerup tiguneranit sapaatip akunneri sisamat qaangiutsinnagit Isumaginninnermi Naammagittaalliuuteqartarfimmut naammagittaalliuuteqartoqassaaq.</p>	<p style="text-align: center;">§ 1</p> <p>Isumaginnittoqarfiup aqunneqarnera aaqqissuussaaneralu pillugit Inatsisartut peqqussutaanni nr. 11 12. november 2001-imeersumi Inatsisartut inatsisaat nr. 14, 6. juni 2016-imeersukkut allanngortinneqartumi makku allannguutigineqassapput:</p> <p>1. § 8 imatut oqaasertaqassaaq: ” § 8. Isumaginninnermut Naammagittaalliuuteqartarfimmut inatsisitigut naammagittaalliuuteqartoqarsinnaatillugu, suliani kommunalbestyrelsip Naalackersuisulluunniit</p>

<p><i>Imm. 2.</i> Isumaginninnikkut malittarisassat naapertorlugit Naalakkersuisut aalajangiisimatillugit suliamut attuumassuteqartup aalajangiineq Isumaginninnermi Naammagittaalliuuteqartarfimmut naammagittaalliuutigisinnaavaa. Tamannali atuutinngilaq aalajangiinerup naammagittaalliuutigineqarsinnaannginneranik inatsisimmi immikkut aalajangersaasoqarsimatillugu. Aalajangiinerup tiguneqarneranit sapaatip akunneri sisamat qaangiutsinnagit Isumaginninnermi Naammagittaalliuuteqartarfimmut naammagittaalliuuteqartoqassaaq.</p> <p><i>Imm. 3.</i> Suliat meeqqanut inuusuttunullu 18-it inorlugit ukiulinnut angajoqqaatut oqartussaassuseqartoq akuersiteqqaarnagu angerlarsimaffiup avataanut inissinneqarsimasunut tunngasut, Nunatta Eqqartuussivianut tunniunneqarsinnaapput Isumaginninnermi Naammagittaalliuuteqartarfiup aalajangiineraniit sapaatit akunnerinik sisamanik piffissaliussap iluani. <i>Imm. 4.</i> Isumaginninnermi Naammagittaalliuuteqartarfiup aamma Landsdommerip piffissaliussap malinneqannginnera isiginnginniarsinnaavaa pineqartoq qaangiinnermut akisussaatinneqarsinnaanngippat.</p>	<p>aalajangiiffigisimasaanni, illuatungiusup aalajangiineq Isumaginninnermi Naammagittaalliuuteqartarfimmut naammagittaalliuutigisinnaavaa. Aalajangiinerup kingorna sapaatip akunneri arfinillit qaangiutsinnagit Isumaginninnermi Naammagittaalliuuteqartarfimmut naammagittaalliuuteqartoqassaaq.</p> <p><i>Imm. 2.</i> Isumaginninnermi Naammagittaalliuuteqartarfiup aalajangigai allaffissornikkut oqartussanut allanut ingerlateqqinneqarsinnaanngillat.</p> <p><i>Imm. 3.</i> Akuersisissummik peqaaqqaarnani meeqqamik inuusuttumilluunniit 18-it inorlugit ukiulimmik angerlarsimaffiup avataanut inissinissamik Isumaginninnermi Naammagittaalliuuteqartarfiup aalajangiinera angajoqqaatut oqartussaassusilimmit meeqqamilluunniit Kalaallit Nunaanni Eqqartuussivinnut tunniunneqarsinnaavoq. Aalajangikkap Kalaallit Nunaanni Eqqartuussivinnut tunniunneqarnera pissaaq aalajangiinerup kingorna sapaatit akunnerisa 4-it iluanni.</p> <p><i>Imm. 4.</i> Isumaginninnermi Naammagittaalliuuteqartarfiup aalajangigai allat, suliamut attuumassuteqartumit eqqartuussisoqarfimmut saqqummiunneqarsinnaapput. Aalajangikkap eqqartuussisoqarfimmut saqqummiunneqarnera pissaaq aalajangiinerup tighuneraniit sapaatip akunneri sisamat qaangiutsinnagit.</p> <p><i>Imm. 5.</i> Isumaginninnermi Naammagittaalliuuteqartarfiup aamma eqqartuussiviup imm. 1-mi, 3-imi aamma 4-imi piffissaliussap malinneqannginnera isiginnginniarsinnaavaat pineqartoq qaangiinnermut akisussaatinneqarsinnaanngippat.”</p>
--	---

<p>§ 9. Isumaginninnermi Naammagittaalliuuteqartarfik siulittaasoqassaaq allanillu 4-nik ilaasortaqaassalluni. Naalakkersuisut siulittaasumik, taassuma sinniisussaanic, ilaasortanic sisamanik taakkulu sinniisusaannik ukiunut 2-nut toqqaassapput. Siulittaasoq inatsisilerituutut soraarummeersimassaaq imaluunniit allatigut Kalaallit Nunaanni inatsisunik isumaginninnermut tunngasunik sukumiisumik paasisimasaqassalluni. Ilaasortat marluk isumaginninnermi inatsisunik ilisimasaqassapput, ilaasortallu marluk isumaginninerup iluani inuiaqatigiit ingerlaasiannik ilisimasaqassallutik. Naalakkersuisut inunnik isumaginninnermi suliat suliarineqarnerini aalajangiivigineqarneriniluunniit peqataasartunik toqqaasinnaangillat.</p> <p><i>Imm. 2.</i> Isumaginninnermi Naammagittaalliuuteqartarfik pisuni aalajangersimasuni inunnik suliamik sammineqartumik immikkut ilisimasaqartunik aggersaasinnaavoq. Inuit taakku Isumaginninnermi Naammagittaalliuuteqartarfimmi taaseqataasinnaatitaangillat.</p> <p><i>Imm. 3.</i> Naalakkersuisut Isumaginninnermi Naammagittaalliuuteqartarfiup suleriaasissaa aalajangersassavaat.</p> <p><i>Imm. 4.</i> Naalakkersuisut Isumaginninnermi Naammagittaalliuuteqartarfimmut allattoqarfeqarnikkut ikiuutissapput.</p>	<p>2. § 9 imatut oqaasertaqassaaq: ” § 9. Isumaginninnermi Naammagittaalliuuteqartarfik ataatsimik siulittaasoqassaaq marlunnillu ilaasortaasussanngortitaqassalluni.</p> <p><i>Imm. 2.</i> Siulittaasoq Isumaginninnermi Naammagittaalliuuteqartarfiup allattoqarfiani naammagittaalliuuteqartarnermi allatseqarfiup pisortaatut atorfinitsinneqassaaq.</p> <p><i>Imm. 3.</i> Naalakkersuisut ilaasortaaitat marluk taakkulu sinniisussaatic ukiuni sisamani atuutussanngorlugit toqqassavaat.</p> <p><i>Imm. 4.</i> Siulittaasoq inatsisilerituutut soraarummeersimassaaq.</p> <p><i>Imm. 5.</i> Ilaasortaq ataaseq sinniisussaalu isumaginninnermut tunngasunik paasisimasaqartuussapput, kiisalu ilaasortaq ataaseq sinniisussaalu inatsisilerituujussapput isumaginninneq pillugu paasisimasaqartut.</p> <p><i>Imm. 6.</i> Inuit isumaginninneq pillugu sulianik ingerlatsinermut imaluunniit aalajangiinernut akuusut toqqarneqarsinnaangillat.</p> <p><i>Imm. 7.</i> Isumaginninnermi Naammagittaalliuuteqartarfik pisuni aalajangersimasuni inunnik suliamik sammineqartumik immikkut ilisimasaqartunik aggersaasinnaavoq. Inuit taakku Isumaginninnermi Naammagittaalliuuteqartarfimmi taaseqataasinnaatitaangillat.</p> <p><i>Imm. 8.</i> Naalakkersuisut Isumaginninnermi Naammagittaalliuuteqartarfiup suleriaasissaa aamma Naammagittaalliuuteqartarfiup allattoqarfiullu sulinerannut malittarisassat</p>
--	---

	<p>sukumiinerusut nalunaarutitigut aalajangersassavaat, taakkununga ilaallutik piffissaliussaasut, naammagittaalliuuteqartarnermut periaatsit ilusiliinissamullu piumasaqaatit, taassuma ataani naammagittaalliuutinik periaatsinik ilusiliinissamullu piumasaqaatinik naammassinninngitsunik itigartitsinnaaneq piumasaqaammullu tassunga atuutitsinnginnissaq, Naammagittaalliuuteqartarfiup siulittaasuata innersuussineratigut Naammagittaalliuuteqartarfiup ilaasortaanik piffissaq sioqqullugu soraarsitsineq kiisalu Naammagittaalliuuteqartarfiup ilaasortaanik akissarsiaqartitsinermut malittarisassat. <i>Imm. 9.</i> Naalakkersuisut Isumaginninnermi Naammagittaalliuuteqartarfimmut allattoqarfeqartitsissapput.”</p>
<p>§ 10. Isumaginninnermi Naammagittaalliuuteqartarfik aalajangiisinnaassuseqartarpoq ilaasortat ikinnerpaamik pingasut najuukkaangata. Isumaginninnermi Naammagittaalliuuteqartarfik amerlanerussuteqarnikkut aalajangiisassaaq. Taasinnermi amerlaqatigiittoqartillugu siulittaasup taasinnera aalajangiisuussaaq. <i>Imm. 2.</i> Isumaginninnermi Naammagittaalliuuteqartarfiup aalajangiineri allaganngorlugit, tunn- gavilersorlugit nalunaarutigineqartassapput. Ataatsimeereernerit tamaasa siulittaasup tunngaviu- sumik aalajangernerit tamanut saqqummiuttassavai. <i>Imm. 3.</i> Siulittaasoq ataatsimiinnermi saqqummiussisoqanngikkaluartoq suliassamik aalajangiisinnaavoq, illersorneqarsinnaasumik tunngavissaqarsimappat, aammalu aalajangiinissaq nalorninaateqanngippat. Siulittaasup Isumaginninnermi Naammagittaalliuuteqartarfiup ilaasortaasa</p>	<p>3. § 10 imatut oqaasertaqassaaq: ” § 10. Suliani naammagittaalliuuteqarfiusuni Isumaginninnermi Naammagittaalliuuteqartarfik ilaasortaataasunik peqataatitaqarani aalajangiisaaq, taamaattoq tak. imm. 2. <i>Imm. 2.</i> Siulittaasup nalilerpagu naammagittaalliummik suliaq tunngaviumik pingaaruteqartuusoq, ilaasortaataasut peqataatillugit suliamik aalajangiisoqassaaq, sulittaasulli nalilerpagu naammagittaalliummik suliaq ima nukinginnartigisoq, ilaasortaataasut peqataatinnagit aalajangiisoqartariaqartoq peqataatinnagit aalajangiisoqassaaq. <i>Imm. 3.</i> Suliani imm. 2-mut attuumassuteqartuni siulittaasoq aalajangersinnaavoq ilaasortanit allakkatigut innersuussuteqarnikkut aalajangiineq pissasoq. Suliat taamaattut ilaasortap</p>

<p>sinneri kingusinnerusukkut ilisimatissavai. <i>Imm. 4.</i> Suliassat allakkatigut suliarineqarnissaat naleqqussorineqarpat taakku ilaasortanut aala- jangiinissamik inassuteqaatitalerlugit nassiunneqassapput. Suliassat taakku ataatsimiinnermi oqaluuserineqassapput ilaasortap ataatsip tamanna piumasarippagu. <i>Imm. 5.</i> Isumaginninnermi Naammagittaalliuuteqartarfik suliaqarfini pillugit ukiut tamaasa nalunaarusiortassaaq.</p>	<p>ataatsip piumasaqarneratigut ataatsimiinnermi suliarineqassapput. <i>Imm. 4.</i> Isumaginninnermi Naammagittaalliuuteqartarfiup aalajangiineri allaganngorlugit, tunngavilersorlugit suliarineqartassapput. Ataatsimeereernerit tamaasa allattoqarfiup tunngaviusumik aalajangernerit tamanut saqqummiuttassavai. <i>Imm. 5.</i> Isumaginninnermi Naammagittaalliuuteqartarfik ukiut tamaasa suliani pillugit nalunaarusiortassaaq.”</p>
<p>§ 11. Isumaginninnermi Naammagittaalliuuteqartarfiup siulittaasuata § 10, imm. 3 naapertorlugu siulittaasutut oqartussaaffini tamakkiisumik ilaannakortumilluunniit Isumaginninnermi Naammagittaalliuuteqartarfiup allattoqarfianut tunniussinnaavai.</p>	<p>4. § 11 imatut oqaasertaqassaaq: ” § 11. Isumaginninnermi Naammagittaalliuuteqartarfik aalajangiisinnaassuseqartarpoq siulittaasoq ilaasortallu marluk taakkualuunniit sinniisussaata najuukkaangata. Isumaginninnermi Naammagittaalliuuteqartarfik nalinginnaasumik amerlanerussuteqarnikkut aalajangiisassaaq. <i>Imm. 2.</i> Isumaginninnermi Naammagittaalliuuteqartarfiup allattoqarfiata allagaatit sulianut tunngasut kommuninit imaluunniit Naalackersuisunit piniartassavaat. <i>Imm. 3.</i> Kommunit Naalackersuisulluunniit naammagittaalliummik tigusaqarnerminnit kingusinnerpaamik sapaatit akunneri sisamat qaangiutsinnagit Isumaginninnermi Naammagittaalliuuteqartarfimmut ingerlateqqereersimassavaat. <i>Imm. 4.</i> Isumaginninnermi Naammagittaalliuuteqartarfiup allattoqarfia suliani nukinginnartuni sapaatit akunnerinik sisamanik sivikinnerusumik piffissaliussinnaavoq.”</p>
	<p>5. § 11-p kingorna ima ilanngussisoqassaaq:</p>

	<p>” § 11a. Isumaginninnermi Naammagittaalliuuteqartarfiup siulittaasuata § 10, imm. 1 malillugu siulittaasutut piginnaatitaanini Isumaginninnermi Naammagittaalliuuteqartarfiup allattoqarfianut tamakkiisumik ilaannakortumilluunniit tunniussinnaavai.”</p>
	<p style="text-align: center;">§ 2</p> <p>Isumaginninnermik suliassaqarfimmi pissaanermik atuineq pillugu Inatsisartut inatsisaat nr. 1, 21. november 2013-meersumi makku allannguutigineqassapput:</p>
<p>§ 26. Kommunimi sumiiffigisami kommunalbestyrelsip immikkoortoq II-mi malittarisassat naapertorlugit aalajangigaanik naammagittaalliutit Isumaginninnermi Naammagittaalliuuteqartarfimmut apuunneqarsinnaapput.</p>	<p>1. § 26 ima oqaasertalerneqassaaq: “ § 26. Kommunimi sumiiffigisami kommunalbestyrelsip immikkoortoq II-mi malittarisassat naapertorlugit aalajangigaanik naammagittaalliutit Isumaginninnermi Naammagittaalliuuteqartarfimmut apuunneqarsinnaapput Isumaginnittoqarfiup aqunneqarnera aaqqissuussaanageralu pillugit Inatsisartut peqqussutaat malillugu.”</p>
<p>§ 48. §§ 31, 33, 34, 35, 36, imm. 2, 38, 39, imm. 2 aamma § 42, imm. 3 naapertorlugit kommunalbestyrelsip aalajangiineri Isumaginninnermi Naammagittaalliuuteqartarfimmut apuunneqarsinnaapput. <i>Imm. 2.</i> Inuk aalajangiinnermi pineqartoq nammineq naammagittaalliuuteqarsinnaangippat, uiusup nuliaasulluunniit, ilaquttap, nakkutilliisup imaluunniit allap inummut pineqaammik pineqartumut sinniisup kommunalbestyrelsip aalajangiinera naammagittaalliutigisinnaavaat.</p>	<p>2. § 48, imm. 1, ima oqaasertalerneqassaaq: “ § 48. §§ 31, 33, 34, 35, 36, imm. 2, 38, 39, imm. 2 aamma § 42, imm. 3 naapertorlugit kommunalbestyrelsip aalajangiineri Isumaginninnermi Naammagittaalliuuteqartarfimmut apuunneqarsinnaapput Isumaginnittoqarfiup aqunneqarnera aaqqissuussaanageralu pillugit Inatsisartut peqqussutaat malillugu.”</p>
<p>§ 49. Najugaqarfissatut neqeroorutinut aalajangersimasunut § 36, imm. 1 aamma 3 naapertorlugit tigutinnermut Ilaqutariinnermut Naalakkersuisup § 42 naapertorlugu aalajangiineri, tighunerani sapaatit akunneri sisamat qaangiutsinnagit Isumaginninnermi Naammagittaalliuuteqartarfimmut apuunneqarsinnaapput.</p>	<p>3. § 49, imm. 1, ima oqaasertalerneqassaaq: “ § 49. Najugaqarfissatut neqeroorutinut aalajangersimasunut § 36, imm. 1 aamma 3 naapertorlugit tigutinnermut Ilaqutariinnermut Naalakkersuisup § 42 naapertorlugu aalajangiineri Isumaginninnermi Naammagittaalliuuteqartarfimmut apuunneqarsinnaapput Isumaginnittoqarfiup</p>

	aqunneqarnera aaqqissuussaanelu pillugit Inatsisartut peqqussutaat malillugu.”
	§ 3 Suliffeerunnermi ikiorsiissutit pillugit inatsisartut inatsisaat nr. 2, 15. maj 2014-imeersumi makku allannguutigineqassapput:
§ 19. Kommunalbestyrelsip § 1, § 6, imm. 54, § 13, imm. 1, aamma §§ 16 aamma 17 malillugit aalajangersimasai Isumaginninnermi Maalaaruteqartarfimmut maalaarutigineqarsinnaapput. <i>Imm. 2. Maalaarummik tunniussinissamut piffissaliussaq tassaavoq aalajangikkap maalaarutigerusutap tigunerata kingorna sapaatit akunneri sisamat(4) qaangiutinnginnerini</i>	1. § 19 ima oqaasertalerneqassaaq: “ § 19. Kommunalbestyrelsip § 1, § 6, imm. 5, § 13, imm. 1, aamma §§ 16 aamma 17 malillugit aalajangersimasai Isumaginninnermi Maalaaruteqartarfimmut maalaarutigineqarsinnaapput Isumaginnittoqarfiup aqunneqarnera aaqqissuussaanelu pillugit Inatsisartut peqqussutaat malillugu.”
	§ 4 Inatsisartut inatsisaat atortuulerpoq ulloq 1. januaari 2018.

3. Pisortanut aningaasatigut allaffissornikkullu kingunerisassai

Siunnersuut pisortanut aningaasaqarnikkut kinguneqassanngilaq.

Isumaginninnermi Naammagittaalliuuteqartarfiup allakkatigut aalajangiisinnaanermut periarfissinneratigut taamalu ilaasortat ornigullutik ataatsimeeqatigiittariaqarnerisa ilimagisamik ikilineqarnissaasa kingunerannik ataatsimiinnernut atatillugit angalanernut il.il. aningaasartuutit killilerneqarsinnaassapput. Aningaasartuutit ilaasortat ikilinerattulli annertutigisumik annikillinissaat naatsorsuutigineqarpoq. Sulinermik ingerlatsinerit pisariillisarnerisa kingunerissaavaat Isumaginninnermi Naammagittaalliuuteqartarfiup naammagittaalliuutit amerlanerusut suliarisinnalissagai.

Naammagittaalliuuteqartarfiup siulittaasuata naammagittaalliornermut pisortatut atorfinitsinneratigut Isumaginninnermi Naammagiittaalliuuteqartarfimmi allattoqarfimmi sullinneqarnermut atugassarititaasunik pisariaqartitsineq annikitsumik annikillissasoq naatsorsuutigineqarpoq, taamatullu iliornikkut atugassarititaasut sulianik suliarinninnermut atorneqarsinnaalissapput.

Suleriaatsit pitsanngortinnerisa kinguneri isumaqarput, Isumaginninnermi Naammagittaalliuuteqartarfiup naatsorsuutigimmagu piffissaq sulianik suliarinninnermut atorneqartartoq sivikillissasoq.

4. Inuussutissarsiutinik ingerlataqartunut aningaasatigut allaffissornikkullu kingunerisassai

Siunnersuut inuussutissarsiutinik ingerlataqartunut aningaasatigut kinguneqassanngitsaq ilimagineqarpoq.

5. Avatangiisinut, pinngortitamut inuiaqatigiillu peqqissusaannut kingunerisassai

Siunnersuut avatangiisinut, pinngortitamut inuiaqatigiillu peqqissusaannut kinguneqassanganneqanngilaq.

6. Innuttaasunut kingunerisassai

Isumaginninnermi suliassaqarfimmi sulianik naammassinnissinnaanerulernermik naammagittaalliuuteqartarnermilu inatsisitigut isumannaatsuunerup qaffanneqarneranik siunnersuut kinguneqassaaq.

Isumaginninnermi Naammagittaalliortarfimmut innuttaasut naammagittaalliuuteqarlutik saaffiginnikkaangamik annertunerusumik digitalikkut aaqqiissutit atortassagaat siunnersuummi aamma piumasarineqarpoq.

Innuttaasunut naammagittaalliuuteqartunut aalajangiinerit ullumikkuminngaanniit sukkanerusumik tiguneqartalernissaat, tamatumalu ilutigisaanik piumasaqarfigineqalernerat siunnersuutip kingunerissavaa.

7. Kingunerisassai pingaarutillit allat

Siunnersuut pingaarutilinnut allanut kinguneqassanganneqanngilaq.

8. Oqartussanik kattuffinnillu il.il. tusarniaaneq

Siunnersuut piffissami 22. junimiit 14. augustimut 2017-imi tulliuuttuni tusarniassutigineqarpoq:

Naalakkersuisut Siulittaasuata Naalakkersuisoqarfia, Pinngortitamut Avatangiisinullu Naalakkersuisoqarfik, Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik, Aalisarnermut Piniarnermullu Naalakkersuisoqarfik, Aningaasaqarnermut Akileraartarnermullu Naalakkersuisoqarfik Ilinniartitaanermut, Kultureqarnermut, Ilisimatusarnermut, Ilageeqarnermullu Naalakkersuisoqarfik, Peqqissutsimut Naalakkersuisoqarfik Namminiilivinnermut, Nunanut Allanut Nunalerinermullu Naalakkersuisoqarfik Kommuninut, Nunaqarfinnut, Isorliunerusunut, Attaveqatigiinnermut Ineqarnermullu Naalakkersuisoqarfik, Aatsitassanut Ikummatissanullu Naalakkersuisoqarfik Pinngortitamut Avatangiisinullu Naalakkersuisoqarfik, KANUKOKA, Qaasuitsup Kommunian, Qeqqata Kommunian, Kommuneqarfik Sermersooq, Kommune Kujalleq, Isumaginninnermi Naammagittaalliuuteqartarfik, Inuit Pisinnaatitaaffii pillugit Kalaallit Nunaata Siunnersuisoqatigiiffiat, Dansk Institut for Menneskerettigheder, MIO, IMAK, Kattuffik Utoqqaat Nipaat, Inooqat, ISI, Neriuffiit Kattufiat, KNIPK, Sugisaaq, KTK, Biskopeqarfik, Sorlak, Foreningen Grønlandske Børn, MIBB, Red Barnet, Kalaallit Røde Korsiat, Blå Kors Grønland, Sukorseq,

Timersoqatigiit Kattuffiat, Grønlands Spejderkorps Nuuk, Plejefamiliernes Lokalforening Nuuk, Kriminalforsorgen, Grønlands Politi

Aamma siunnersuut Namminersorlutik Oqartussat tusarniaanermut nittartagaani tamanut tusarniutigineqarpoq.

Tusarniaanermut akissutit tulliuuttunit tiguneqarput:

Aningaasaqarnermut Akileraartarnermullu Naalakkersuisoqarfik, Pinngortitanut Avatangiisinullu Naalakkersuisoqarfik, Kommuneqarfik Sermersooq, Sulisitsisut, Isumaginninnermi Naammagittaalliuuteqartarfik, Institut for Menneskerettigheder (Inuttut Pisinnaatitaaffit pillugit Institutti) aamma IMAK.

Tulliuuttuni tusarniaanermi akissutit aamma tusarniaanerup nalaani allannguutissatut siunnersuutit suliarineqassapput. Taaneqassaaq tusarniaanermut akissutit uingasumik naqitaasut pingaarnersiunnarlugit allanneqarmata pingaassusaannik nalilliineq tunngavigalugu.

Tusarniaanermi akissutit tamakkiisut tamarmik Inatsisartuni ataatsimiititaliamut taakkuninnga suliaqartumut ilanngullugit nassiunneqarput.

Aningaasaqarnermut Akileraartarnermullu Naalakkersuisoqarfik Isumaginnittoqarfiup aqunneqarnera aaqqissuussaanelu pillugit Inatsisartut peqqussutaata allanngortinneqarnissaanut oqaaseqaateqanngilaq.

Pinngortitanut Avatangiisinullu Naalakkersuisoqarfik tusarniaaneq pillugu nassiussanut qujavoq siunnersuummullu oqaaseqaatissaqarnani.

Kommuneqarfik Sermersuup Isumaginninnermi Naammagittaalliuuteqartarfiup sulianik ingerlatsinermini naammassissaqarfiunerulernissaanut siunnersuutip anguniagaa taperserpa.

Kommuneqarfik Sermersuup siunnersuutigaa siunnersuummi § 11, imm. 3-mi sapaatip akunnerisa 8-nngortinnissaat sapaatip akunneri 4-tinnagit, tassa Isumaginninnermi Naammagittaalliuuteqartarfiup paasisutissat pigeriikkat tunngavigalugit aalajangiisinnaanerannik aalajangiineq tassaamat suliamik paasisutissiineq pillugu ingerlatsinikkut eqqartuussisutigoortumik tunngaviusunik saneqqutsinerummat.

Aalajangersagaq naleqqussarneqarpoq, taamaasilluni taamaallaat piffissaliussamik imaqalerluni, tunngavissatut pigineqartut tunngavigalugit aalajangiisinnaanerumut piginnaatitaaneq imariunnaarlugu. Suliani piffissaliusaaq qaangerneqarsimatillugu, suliaq Nakkutilliisoqarfimmut, kommuninik nakkutilliisuusunut ingerlateqqinneqartassaaq. Inuuttaasunut sukkasuumik naammassiuminartumillu sullissinissaaq pillugu sapaatit akunnerinut 4-nut piffissaliusaaq siunnersuummi aalajangersakkami ingerlateqqinneqarpoq.

Sulisitsisut oqaatigaat § 9, imm. 1-imi ersertoq Isumaginninnermi Naammagittaalliuuteqartarfik inuttaqartoq siulittaasumik aamma ilaasortaatitanik 2-nik. § 10, imm. 1-imi erserpoq "Isumaginninnermi Naammagittaalliuuteqartarfik suliani... ilaasortaatitanik ilaqarnani aalajangiisassapput..." Sulisitsisut oqaatigaat § 10, imm. 1-imi allassimasariaqaraluartoq "siulittaasoq" imaanngitsoq "Isumaginninnermi Naammagittaalliuuteqartarfik".

Ilumoorpoq suliani § 10, imm. 1 naapertorlugu aalajangiiffigisani ilaasortaatitanik peqataasoqanngiffinni siulittaasoq aalajangiisuussamat. Taamaattorli suli Isumaginninnermi Naammagittaalliuuteqartarfik (Isumaginninnermi Ataatsimiititaliaq) tassaapput oqartussaasut sulianilu aalajangiisuullutik, naak oqartussaasut taakku ilaatigut tamaallaat siulittaasumit kisimiilluni aalajangiisoqartaraluartut. Taamaattumik aalajangersakkap oqaasertai allanngortinnagit attatiinnarneqarput.

Sulisitsisut oqaaseqarput nassuiaatini erseqqissarlugu allassimasariaqaraluartoq suliat sorliit imm. 1-imi pineqanngitsut § 10, imm. 3-mi pineqarnersut.

Oqaaseqaat tusaatissatut tiguneqarpoq, taamaattumillu § 10, imm. 1-imi imaluunniit imm. 2-mi pineqanngitsunik suliaqanngimmat imm. 3 peerneqarpoq.

Isumaginninnermi Naammagittaalliuuteqartarfik (IN) isumaqarpoq siunnersuutip massakkutut isikkoqartilluni innuttaasut eqqartuussisoqarnikkut isumannaatsuunissaat iluaqusissanngikkaa piffissarlu sulianik ingerlatsinermut atorneqartoq sivikillisissanngikkaa. IN isumaqarpoq naammagittaalliuuteqartarfiup ilaasortaasa amerlassusaat piffissap sulianik ingerlatsinermut sivikillisinnissaanut attuumassuteqanngitsoq oqaatigalugulu naammagittaalliuuteqartarfiup katiterneqarnerata allanngortinneqarneratigut innuttaasut ajunngitsumik sullinneqarnissaminut pisinnaatitaaffimminnik arsaarneqartut. IN isumaqarpoq siunnersuutip innuttaasut inissisimani eqqartuussisutigullu isumannaatsuunissaat ajorseriartikkai.

IN-ip oqaatigaa suliat amerlanerit eqqarsaatigalugit kommunini piffissap sulianik ingerlatsinermut atorneqartup sivilissusaata kingunerisaraa Isumaginninnermi Naammagittaalliuuteqartarfik piffissamik sulianik ingerlatsinermut atuinerata sivilissarnera.

Inatsisimik allannguinerup siunertaraa Isumaginninnermi Naammagittaalliuuteqartarfik suleriaasaata naammassiuminarsagaanissaa innuttaasunut innuttaasullu eqqartuussisoqarnikkut isumannaannissaanut iluaqutaasussamik. Siunnersuummi naammassiuminarsaasoqarpoq Isumaginninnermi Naammagittaalliuuteqartarfik sulianik ingerlatsinermi piffissamik atuinerat annikillisinneqassalluni. Katiterneqarnerat nutaaq 3-nik ilaasortalerlugit 5-nut taarsiullugu kinguneqassaaq aalajangiisartut akulikinnerusumik naapittarnissaannik ilaasortanullu kinaassusersiortuunngitsuunissamik piunasaqaatitigut aalajangiisartut aalajangigaanni sulianut tunngasumik pitsaassuseq qularnaarneqassaaq.

Kommuni piffissap sulianik ingerlatsinermut atorneqartup sivilissarnerujussua taamaalilluni pakkersimaarneqassaaq Isumaginninnermi Naammagittaalliuuteqartarfimmi suleriaatsip pitsanngorsarneratigut taamalu massakkorniit sukkanerusumik aalajangiisoqartalernissaatigut. Tamatuma innuttaasut iluaqusissavai soorlu aamma kommunit iluaquserneqassasut

naammagittaalliuuteqartarfimmi suleriaasisannut sulianik ingerlatsinertik naleqqussarsinnaalissagaat.

Siunnersuutip tamaalilluni innuttaasut iluaqusissavai taakkulu isumaginnermi suliat maalaarutit sukkasuumik ingerlanneqarnissaannik qularnaarullugit.

IN isumaqarpoq siunnersuutip massakkutut isikkoqarnermigut kommunini tamaviaartitaareeqisuni pissutsit ajornerulersissagai. IN isumaqarpoq kommunit unammilligassaminnut ikiorserneqartariaqartut aammalu kommunit annertunerusumik piunaffiqineqartariaqanngitsut ilaatigut soorlu sulianut uppernarsaatinik nassiussinissamut piffissaliussat sukangasuut eqqarsaatigalugit.

Kommuneqarfik Sermersuumiit aamma Aningaasaqarnermut Akileraartarnermullu Naalakkersuisoqarfimmiit tusarniaanermut akissutini tiguneqarsimasuni allassimasoqanngilaaq siunnersuutip kommunini pissutsit ajorseriartitsissagai aammalu allassimasoqarani kommunit aningasartuutaasa annertunerulernissaannik kinguneqassasoq.

Suliassaqrarfiit siunnersuummit attorneqartut ullumikkut kommuninit ingerlanneqareerput siunnersuutillu kommunini sulianik ingerlatsineq malittarisaliutissanngilaa. Kommunit pisussaaffeqareerput sulianik ingerlatseriaatsimik ajunngitsumik ileqqoqarnissaminnut. Siunnersuut kommunitut atuuttut eqqarsaatigalugit annertunerusumik piunasaqarfingngilai.

Siunnersuut taamaallaat Isumaginninnermi Naammagittaalliuuteqartarfiup sulianik ingerlatseriaasiannut tunngasuvoq annertunerusumillu naammassiuminarsagaanera innuttaasunut sulianik tunngassuteqartunut kommuninullu iluaqutaassalluni, tassa kommunit erseqqissumik paasisinnaassammassuk suliat nutaamik ingerlanneqassanersut sulianilluunniit ingerlatsineq allanngortinneqassanersoq.

IN isumaqarpoq siunnersuut ullumikkut IN-ip aalajangiisarnernup ingerlanneranut naleqqiullugu atuunneranik aamma aalajangiisartut ilaasortaasa tunngaviisigut misilittagaallu eqqarsaatigalugit ajorseriartitsissasoq.

Isumaginninnermi Naammagittaalliuuteqartarfik maannakkutut suli isumaginninnermi kommunit Naalakkersuisulluunniit aalajangigaannik naammagittaalliuuteqarnermi aalajangiisussat qullersaraat, isumaginninnermi naammagittaalliuutinik suliassat suliarineqarnissaannik isumaginnittut. Taamaalilluni siunnersuutip aalajangiinnermi suleriaaseq allanngortissanngilaa, aalajangiisartulli ilaasortaasa kinaassusertuunngitsumik toqqarneqarnissaasa aalajangiinerni annertuumik pitsaassuseqarnissaq qulakkiissavaat. Naammagittaalliuuteqartarfiup suliassaasa akulikitsumik assigiipajaamik pissuseqarnerat eqqarsaatigalugu siulittaasoq pisinnaatinneqarpoq sukkasuumik aalajangiisinnaanissaminut, innuttaasunut iluaqutaasussamik.

IN-ip oqaatigaa naammagittaalliuuteqartarfiup pisortaqarnissaa Danmarkimi Ankestyrelse-mit isumassarsiatut sunnerneqarsimasoq aamma IN isumaqarpoq qallunaat inatsisilioriaasiata ilaaginnarnissaa tunuarsimaarfisariaqartoq, ulluinnarnimi pissutsit Kalaallit Nunaanninngarnit allaanerummata.

Isumaginninnermi Naammagittaalliuuteqartarfik nutaamik aaqqissorneqarnerata naammagittaalliuuteqartarfiup pisortassaanik atorfinitsitsinikkut piginnaasumik sunniuteqarluartumillu isumaginninnikkut sulianik ingerlatsineqarnissamut innutaasut qulakkeerutissavaat. Inatsimmut siunnersuut Kalaallit Nunaanni atuutussaasut naatsorsuunneqarluni suliarineqarpoq.

IN isumaqarpoq siunnersuut kommuninut annertuumik aningaasaqarnikkut sunniuteqassasoq. IN isumaqarpoq tamanna sukumiinerusumik misissorneqartariaqartoq nassuiaatinilu ersitsuusariaqartoq aningaasaqarnikkut kommuninut qanoq sunniuteqassanersoq.

Kommuneqarfik Sermersuup aamma Aningaasaqarnermut Akileraartarnermullu Naalakkersuisoqarfiup tusarniaanermut akissutaanni allassimasoqanngilaq siunnersuut kommuninut aningaasaqarnikkut sunniuteqassasoq. Kommunit pisussaaffeqareerput sulianik ingerlatseriaatsimik ajunngitsumik ileqqoqarnissaminnut. Siunnersuut piumasaqaatit atuutereersut sinnerlugit allanik piumasaqaatitaqanngilaq.

IN isumaqarpoq Isumaginninnermi Naammagittaalliuuteqartarfiup nutaamik katiterneqarnerata kingunerissagaa aalajangiisartut allaffissornermut pituttorneqarneq. Taamaalilluni siunnersuutip innuttaasunut eqqartuussisoqarnikkut isumannaatsuutinneqarnissaata pitsaanerulersinneqarneranik kinguneqassanngilaq.

Isumaginninnermi Naammagittaalliuuteqartarfiup aamma nutaamik katiterneqarnermigut isumaginninnermi kommunit Naalakkersuisullu aalajangigaannik maalaaruteqarnermi ingerlatiteqqiffissat aalajangiisartullu qullersarissavaat, taamaalillutillu allaffissornermut pituttorsimassanatik. Ilaasortaasut katiterneqarnissaannut kinaassusersiortuunngitsumik tunngaveqanissap sulianut tunngasutigut qaffasissumik pitsaassuseqarnissaq qularnaarpaa taamalu innuttasut eqqartuussisoqarnikkut isumannaatsuutinneqarnissaat pitsaanerulersillugu, sulinermik ingerlatsinikkut naammassisaqarnerunissaat aamma aalajangiisartut aalajangigaasa suliat eqqarsaatigalugit tunngaveqarluarnerunissaat eqaarsaatigalugit.

IN isumaqarpoq siunnersuummi allattoqarfearneq eqqarsaatigineqarnerusoq aamma nutaamik katiterneqarnerata ullumikkut Imasumaginninnermi Naammagittaalliuuteqartarfiup iluanni sulianut tunngasut eqqarsaatigalugit pikkorissuseq aamma ilisimasaqarluarneq annikillisinneqassasut ullumikkut IN-ip ilaasortai politikerinit toqqarneqartarnerannut naleqqiullugu.

Isumaginninnermi Naammagittaalliuuteqartarfiup ilaasortai maanna tikillugu pisarnertut Naalakkersuisunit toqqarneqartassapput, aammalu siulittaasoq Isumaginninnermi Naammagittaalliuuteqartarfiup naammagittaalliuuteqarnermut pisortaattut atorfinitsinneqassalluni. Allattoqarfik manna tikillugu pisarnertut Isumaginninnermi Naammagittaalliuuteqartarfik sullissisuusaaq.

Kinaassusersiortuunngitsumik tunngaveqarnikkut Isumaginninnermi Naammagittaalliuuteqartarfik sulianut tunngasutigut patajaannerat nakussassarneqassaaq innuttaasut sulianik ingerlatsinermi sulianut tunngasunik pikkorissutsimik pitsaasumik qularnaarunneqarnissaannik kingunilimmik.

IN isumaqarpoq naammagittaalliuuteqartarnermut pisortaasusaaq pillugu suut eqarsaatigineqarsimanersut ersisimasariaqartoq.

Siunnersuummi imaluunniit nassuiaatini maalaaruteqarnermi pisortaasussap atorfianut atorfiup allaaseerinissaanut periarfissaqarsimanngilaq. Ilimagineqarpoq naammagittaalliuuteqartarnermut pisortaap inatsisilerituujussasoq isumaginninnerup tungaatigut ilisimasalik. Pissutsit sukumiinerusut taamaattoqassappat atorfimmuut inuttassarsiuussinnermi takuneqarsinnaassappat.

IN isumaqarpoq naammagittaalliuuteqartarfiup ilaasortaasa ukiuni marlunni atuunnerisa ukiunut sisamanut allanngortinneqarnerata tunngavilersornera nassuiaatini ersersimasariaqartoq.

Piffissap ukiunik 4-nik sivilissusillip aalajangiisartut ingerlaavartumik aalajangiisartut suliaasaannik itinerusumik ilisimasaqarnissaat sulianullu tunngasutigut pitsaasumik tunngaveqarnissaat qulakkiissavaa.

IN-p siunnersuutigaa ilaasortaatitaq siunnersuummi inatsisilerituujusussaq taarsiullugu inuiaqatigiinnii pissutsinik ilisimassaliussasoq, Kalaallit Nunaanni inatsisilerituut isumaginninneq pillugu ilisimasallit amerlanngimmata.

Siunnersuummi Isumaginninnermi Naammagittaalliuuteqartarfiimmi sulianut tunngatillugu qaffasissumik ilisimasaqarnissaannik qularnaarinissaq anguniarneqarpoq taamaattumillu aalajangersakkap oqaasertai attatiinnarneqarput imaalerluni ilaasortaatitap kingoraartissaatalu inatsisilerituujunissaannik piumasaqaat ataannassasoq.

IN-ip siunnersuutigaa § 10, imm. 1 allanngortinneqassasoq imaalerluni siulittaasoq aalajangiisassasoq massakkutut pinnani Isumaginninnermi Naammagittaalliuuteqartarfik aalajangiisassasut.

Qulaani Sulisitsisunut tusarniaanermut akissuteqaataata suliarinera akissutitut innersuussutigineqarpoq.

IN-ip siunnersuutigaa nassuiaatini § 10, imm. 1 pillugu suliat qanoq ittut aalajangiisartunut saqqummiunneqartassaneritut assersuusiorluni itisilerisoqassasoq.

§ 10, imm. 2-mi saqqumereerpoq suliani tunngaviusuni ataatsimiinnerni aalajangiisoqartassasoq.

IN isumaqarpoq piffissarititaasoq § 11, imm. 2-mi taaneqartoq inatsiliornermi erseqqissumik taaneqartariaqartoq. Taamatuttaaq IN allappoq piffissarititaasoq kommunit angumerisinnaassaat eqqarsaatigalugit piffissarititaasoq aalajangerneqassasoq.

§ 11, imm. 3-mi aalajangersarneqarpoq allagaatinik nassiussinissamut piffissaliussaq sapaatit akunnerinik 4-inik sivilissuseqartoq. Tamassuma qulakkeerpaa kommunit Naalakkersuisullu allagaatinik piumaneqartunik nassiussisinnaanissaat, taamaalilluni innuttaasut suliakkiissumminnik sukkasuummik aalajangiiffigineqarnissaat qulakkeerneqarlunittaaq. Innuttaasut inuunerannut akuliunnerujussuusinnaavoq allagaatit nassiunneqarnissaat utaqqerujussuassappassuk.

Institut for Menneskerettigheder allappoq erseqqissarneqartariaqartoq Isumaginninnermi Naammagittaalliuuteqartarfik sumi inissisimanerat aamma taanna Naalakkersuisut ilaannit peqqussummut siunnersuummi § 8, imm. 1-imi taaneqartumit isumaginninnermi malittarisassat naapertorlugit aalajangiisartunit immikkoortariaqartut.

Aalajangiisartut katiterneqarneranit saqqumereerpoq Isumaginninnermi Naammagittaalliuuteqartarfik attaviitsuusoq. Taamaalilluni aaqqissuussinikkut inissisimanerat aalajangiisartut sulinerannut sunniuteqanngilaq inatsisitigullu aalajangiisartut sumi inissisimanissaannik aalajangiineq atortussatigut allannguisuussanani.

Instituttip innersuussutigaa nassuiaatini aalajangiinerit qanoq ittut § 8, imm. 1-imi oqaasertaliunneqarsimasut tunngavigalugit aalajangiisartut piginnatitaaneritut ilaanersut erseqqissarneqassasoq.

Siunnersuut tusaatissatut tiguneqarpoq aamma § 8, imm. 1-imi oqaasertaliunneqartut tulluarsarneqarput massakut erserluni aalajangiisoqarnerup saniatigut aamma Isumaginninnermi Naammagittaalliuuteqartarfimmuut naammagittaalliuuteqarsinnaaneq ammasoq aalajangiisoqarnerani inatsit atorineqartoq imaluunniit atorineqartariaqartoq tunngavigalugu.

Instituttip innersuussutigaa pisortat ingerlatsineranni sulianik ingerlatsinermi piffissaq atorineqartoq ammasuutinneqartariaqartoq suliat amerlassusaannik sulianillu ingerlatsinermi piffissamik atuinermik ukiumoortumik tamanut saqqummiussinikkut.

Isumaginninnermi Naammagittaalliuuteqartarfik ukiumoortumik nalunaarusiortareerpoq taannalu suliat amerlassusaannik sulianillu ingerlatsinermi piffissamik qanoq annertutigisumik atuinermik imaqartarpoq.

Instituttip innersuussutigaa Isumaginninnermi Naammagittaalliuuteqartarfimmi nutserisoqarneq/oqalutseqarneq nukittorsarneqassasoq sulianik ingerlatsinermi piffissap sivikillisinneqarnissaa, paatsoornerit taamalu innuttaasut eqaartuussisoqarnikkut isumannaatsuunissaasa qularnaarnissaat eqqarsaatigalugit.

Isumaginninnermi Naammagittaalliuuteqartarfik Naalakkersuisut qitiusumik nutserisoqarfiannik/oqalutseqarfiannik ajungitsumik aammalu nutserisunik/oqalutsinik avataaneersunik illullu iluaneereersunik suleqateqarluarput. Aalajangiinissamut sukkasuumik naammassisaqarluartumillu innuttaasut sulianik ingerlatsiffigineqarnissaata qularnaarnissaat ilutigalugulu nutsikkat naammassineqarniariarpata nassiuunneqarsinnaanissaannut periarfissaqarpoq. Taamaalilluni sulianik ingerlatsineq sukkasooq naammassisaqarfiulluarterlu eqqarsaatigalugu innuttaasut kiffartuunneqarnerat pissaq ilutigalugulu innuttaasut oqaatsitik atorlugit aalajangiiffigineqarnerat suliap ingerlannerani piffissamik atuneq sivitsorsanngikkaluarlugu qularnaarneqassalluni.

Suliassanik suliarinnittarnerup sivikillisarniarneqarnera inatsisitigullu isumannaatsuunerup pitsanngorsarniarneqarnera IMAK-ip tikilluaqquaa.

Taamaattoq IMAK-ip ernumassutigaa naammagittaalliuuteqarnermi ilusissat pillugit aalajangersaanerup inuit naammagittaalliornaveersaartissinnaagai.

Siunnersuutip § 9, imm. 8-aani naammagittaalliuutit ilusissaannut sukumiinerusumik malittarisassaliorneqarsinnaanerat periarfissinneqarpoq, taassumalu ataaniilluni itigartitsisinnaanermut immikkullu ittumik aalajangiisinnaanermut malittarisassat pineqarput.

Inuuttaasut sukkanerusumik naammassiuminartumillu sullinneqarneqarnissaat siunertaavoq. Naammagittaalliuuteqarnermut ilusissatut piumasaqaatit qulakkiissavaat naammagittaalliuutip imaata ajornannginnerusumik elektroniskiusumik atuarneqarsinnaalernissaa kiisalu nutsigassaappat sukkanerusumik nutserneqarsinnaanissaa.

Ilusissatut piumasaqaatit taamaalillutik qulakkiissavaat innuttaasut naammassiuminartumik sullinneqarnissaat, taannalu ilutigalugu inuit ataasiakkaat digitaliusumik naammagittaalliortarfimmik atuisinnaanngitsut immikkut ittumik akuerisoqarneratigut sullinneqarsinnaanerat periarfissinneqarpoq. Taamaalilluni innuttaasut digitaliusunut atuinissamik sanngiitsut Isumaginninnermi Naammagittaalliuuteqartarfimmut naammagittaalliorsinnaanerat akornuserneqanngilaq.

Siunnersuummi aalajangersakkat ataasiakkaat nassuiaataat

§ 1-imut

Nr. 1-imut

Maannakkut isumaginnittoqarfik pillugu peqqussummi atuuttumi § 8, imm. 1 aamma 2 § 8, *imm. 1,-* ip pingaarnersiorlugu ingerlateqqippaa. Aalajangersagaq naapertorlugu isumaginninnermi malittarisassat naapertorlugit kommunalbestyrelse imaluunniit Naalakkersuisut aalajangiisimatillugit suliamut attuumassuteqartup aalajangiineq Isumaginninnermi Naammagittaalliuuteqartarfimmut naammagittaalliuutigisinnaavaa. Inuup naammagittaalliorsinnaanerata nalilernerani ingerlatsinermi inatsisitigut suliamut attuumassuteqartuunermut paasinninneq nalinginnaasoq tungaviussaaq. Kommuninit Naalakkersunillu aalajangikkat naammagittaalliuutigineqarnerisa ataatsimuulersinneqarneranni anguniarneqarpoq inatsisiliornerup oqilisarneqarnissaa assigiissaarneqarnissaalu. Taassuma saniatigut aalajangersakkami naammagittaalliuuteqarsinnaanermut piffissaliussaq sapaatit

akunnerinut 6-ilinnut aalajangersarneqarpoq, tamannalu massakkut isumaginninnermi peqqussummi atuuttumi sapaatit akunnerinik 4-nik piffissaliussamik sivitsuineruvoq.

§ 8, *imm.* 2-p aalajangerpaa Isumaginninnermi Naammagitaalliuuteqartarfiup aalajangigai allaffissornikkut oqartussanut allanut ingerlateqqinneqarsinnaanngitsut.

§ 8, *imm.* 3, Aalajangigaaq eqqartuussiviit pillugit iluarsaaqqinnermut naleqqussagaavoq imaalerluni Kalaallit Nunaanni Eqqartuussiviit suliap saqqummiunneqarnerani siulliullutik suliarinnittuussasut. Aammalu Meeqqat tapersorsorneqarnissaannut Inatsisartut Inatsisaata akuersissutigineqarneratigut inatsisitigut tunngavilerneqarpoq meeqqap suliamik eqqartussivinnut saqqummiussinnaagaa.

Aalajangiinerup kingorna sapaatit akunneri sisamat tikillugit suliaq Kalaallit Nunaanni Eqqartuussivimmuut suliaassanngortinneqarsinnaavoq. Aalajangiineq oqaatsit naammagittaalliutit allanneqaatai atorlugit, imaluunniit Pisortat ingerlatsineranni suliaassat suliarineqartarnerat pillugu Inatsisartut inatsisaat nr. 8, 18 juni 1994-imeersumi § 7a malillugu sullinneqarnissamut qinnuteqaataani oqaatsit atoqqusai atorlugit pigineqalerneraniit piffissaliussaq naatsorsorneqassaaq.

§ 8, *imm.* 4, aalajangersakkap erseqqissarpaa Isumaginninnermi Naammagittaalliuuteqartarfiup aalajangigaasa allat suliaassanngortinneqarneri Eqqartuussisoqarfinnut ingerlatinneqassasut.

§ 8, *imm.* 5-ip aalajangersagaq atuuttoq § 8, *imm.* 4 ingerlateqqippaa.

Nr. 2-mut

§ 9, *imm.* 1-ip aalajangerpaa Isumaginninnermi Naammagittaalliuuteqartarfik inuttaqartoq siulittaasumik ataatsimik ilaasortanillu marlunnik.

§ 9, *imm.* 2-mi aalajangerneqarpoq Siulittaasoq allattoqarfimmi naammagitaalliuuteqartarnermut pisortatut atorfinitsinneqassasoq.

§ 9, *imm.* 3-mi aalajangerneqarpoq Naalakkersuisut ilaasortaatitanik taakkulu sinniisussaannik 2-nik piffissami ukiuni 4-ni atuuttussanik toqqaassasut.

§ 9, *imm.* 4,-mi aalajangerneqarpoq Siulittaasoq inatsisilerituutut soraarummeersimassasoq aamma inatsisilerinermik siamasissumik tunuliaqutaqarluassasoq.

§ 9, *imm.* 5, Naalakkersuisunit ilaasortaatitaasut aappaa inatsisilerituujussaaq aappaalu isumaginninnermi sulineramik tunngaveqassalluni.

§ 9, *imm. 6*, Inuit isumaginninneq pillugu kommunini sulianik ingerlatsinermut imaluunniit Naalakkersuisuni sulianik ingerlatsinermut akuusut ilaasortatut sinniisussatulluunniit toqqarneqarsinnaanngillat.

§ 9, *imm. 7*-ip § 9, *imm. 2*-mi aalajangersagaq ingerlateqqippaa, tassanilu allassimavoq Isumaginninnermi Naammagittaalliuuteqartarfik pisuni aalajangersimasuni inunnik suliamik sammineqartumi immikkut ilisimasaqartunik aggersaasinnaasoq, ass. suliani peqqissutsip tungaatigut pisariusuni nakorsat suliaannut tunngasuni siunnersorti.

§ 9, *imm. 8*-mi aalajangersagaq atuuttoq ingerlateqqinneqarpoq ilassuserneqarlunilu. Naalakkersuisut Isumaginninnermi Naammagittaalliuuteqartarfiup suleriaasissaa aamma Naammagittaalliuuteqartarfiup allattoqarfiullu sulinerannut malittarisassat sukumiinerusut nalunaarutitigut aalajangersassavaat, naammagittaalliuuteqarnermi ilusissat qanoq ittuunissaannut piumasagaatit, taassuma ataani naammagittaalliuutinik ilusissanik naammassinninngitsunik itigartitsinnaaneq piumasagaammullu tassunga atuutitsinnginneq, naammagittaalliuuteqartarfiup siulittaasuata innersuussineratigut naammagittaalliuuteqartarfiup ilaasortaanik piffissaq sioqqullugu soraarsitsineq kiisalu naammagittaalliuuteqartarfiup ilaasortaanik akissarsiaqartitsinermut malittarisassat. Aalajangersagaq atuuttumut naleqqiullugu annertusisaavoq imaalarluni Isumaginninnermi Naammagittaalliuuteqartarfimmi sulianik ingerlatsineq digitaliusumik suleriaaseqarnikkut naammassiuminarsagaasinnaasoq.

§ 9, *imm. 9*-mi aalajangersagaq atuuttoq ingerlateqqinneqarpoq, tassani allassimavoq Naalakkersuisut Isumaginninnermi Naammagittaalliuuteqartarfimmut allattoqarfeqartitsissasut. Ullumikkut Atuisartoqarnermut aamma Unammilleqatigiinnermut Aqutsisoqarfik Isumaginninnermi Naammagittaalliuuteqartarfimmut allattoqarfeqartitsivoq.

Nr. 3-mut

§ 10, *imm. 1*-imi Inatsisartut inatsisaanni aalajangerneqarsimappat Isumaginninnermi Naammagittaalliuuteqartarfimmut sulianik naammagittaalliuuteqartoqarsinnaasoq Isumaginninnermi Naammagittaalliuuteqartarfik piuamaffigineqarpoq ilaasortaatitaasunik peqataatitaqarani aalajangiisassasoq (siulittaasup aalajangiineri).

§ 10, *imm. 2*, aalajangersagaq naapertorlugu siulittaasoq naliliisinnaavoq suliaq *imm. 1*-imut attuumassuteqartoq tunngaviusumik pingaaruteqartuusooq taamaammallu suliaq ataatsimiinnermi Isumaginninnermi Naammagittaalliuuteqartarfimmut saqqummiunneqassasoq. Suliani tunngaviusumik pingaarutilinni nukingernartunili siulittaasoq aalajangiisuusinnaavoq ilaasortaatitaasunik peqateqanngikkaluarluni.

§ 10, *imm. 3*, suliaq Isumaginninnermi Naammagittaalliuuteqartarfimmi allakkatigut aalajangiiffigineqarsinnaanersoq Isumaginninnermi Naammagittaalliuuteqartarfiup siulittaasuata

nalilersinnaagaa aalajangersakkami periarfissinneqarpoq. Siulittaasoq naliliippat suliaq taamatut pineqarnissaminut naleqquttoq aalajangiinissamut siunnersuut Isumaginninnermi Naammagittaalliuuteqartarfimmut elektroniskimik nassiunneqassaaq. Tamatuma kingunerisaanik ilaasortat suliap aalajangiiffigineqarnissaanut siunnersuummut isumaqataanerlutik elektroniskiusumik nalunaarutigissavaat.

Tamatuma kingunerissavaa nammagittaalliuuteqartarfiup siornatigornit naleqqiullugu sukkanerusumik aalajangiisinnaanngornera, siornatigut suliat Isumaginninnermi Naammagittaalliuuteqartarfimmi ataatsimiinnissap tullianut suliat utaqqisunneqartarmata. Isumaginninnermi Naammagittaalliuuteqartarfik amerlanerussuteqarnikkut aalajangiisassaaq. Aalajangiinissamut siunnersuutit allaganngorlugit nassiunneqassappata piumasqaataavoq allattoqarfiup ilaasortallu akornanni attaveqatigiinneq paasiuminaallisarneqassasoq imaalerluni paasissutissat susasaqanngitsunit tiguneqarsinnaajunnaarsillugit. Taamaalilluni nalinginnaasumik e-mailikkut attaveqatigiinneq naammagintumik isumannaatsuunngilaq.

Isumaginninnermi Naammagittaalliuuteqartarfimmi ilaasortap ataatsip kissaatigippagu suliaq ataatsimiissutigineqassasoq, taava suliaq ataatsimiinnissamut tullermut suliarineqartussanngortinneqassaaq. Tamanna suliap suliarineranut piffissamik atorineqartumik sivitsorsaataasinnaavoq.

§ 10, *imm. 4*-imi aalajangersagaq atuuttoq ingerlateqqinneqarpoq. Aammalu aalajangersarneqarpoq ataatsimeereernerit tamaasa allattoqarfiup tunngaviusumik aalajangernerit tamanut saqqummiuttassagai. Tamanut saqqummiutsinnagit inuit sumiiffillu atii peerneqartassapput taamaalilluni aalajangiinnermi kikkut pineqarnersut paasissutissallu mianernartut takuneqarsinnaajunnaarsinneqarlutik. Aalajangiineq tunngaviusoq tassaassaaq assersuutigalugu suliaasaqarfimmut aalajangersimasumut najoqqutassiippat, Naalakkersuisut suleriaasiannut imaluunniit ilitersuutaannut akerliuppat, suleriaatsinut nalinginnaasunut erseqqissaataappat, imaluunniit inuiaqatigiinni ineriartornerneq pissutigalugu Isumaginninnermi Naammagittaalliuuteqartarfiup siusinnerusukkut aalajangiinera allanngortinneqarpat.

§ 10, *stk. 5*-imi aalajangersagaq atuuttoq ingerlateqqinneqarpoq, tassani Isumaginninnermi Naammagittaalliuuteqartarfiup suliani pillugit ukiut tamaasa nalunaarusiornissaa aalajangersagaalluni. Nalunaarusiap qaammatisiutit ukiuat malissavaa, Isumaginninnermilu Naammagittaalliuuteqartarfiup tunngaviusumik aalajangiinerisa sukumiisumik imaqarniliornerinik imaqartassalluni.

Nr. 4-mut

§ 11, *imm. 1*, aalajangersakkap imarai Isumaginninnermi Naammagittaalliuuteqartarfiup qanoq aalajangiisarnissaanut malittarisassat.

Isumaginninnermi Naammagittaalliuuteqartarfik aalajangiisinnaassuseqartarpoq siulittaasoq aamma ilaasortaatit ikinnerpaamik marluk imaluunniit taakku sinniisussaata suliap suliarinerani najuukkaangata. Naammagittaalliuuteqartarfik nalinginnaasumik amerlanerussuteqarneq tunggavigalugu aalajangiisarpoq.

§ 11, imm. 2. Allattoqarfiup allagaatit kommuninut Naalackersuisunullu pissarsiariniassavai, taamaalilluni Isumaginninnermi Naammagittaalliuuteqartarfimmut paasisutissat sulianut tunggasut tunniunneqarsinnaassammata.

§ 11, imm. 3. Allagaatit pigineqartut kommunip Isumaginninnermi Naammagittaalliuuteqartarfimmut nassiunniissaannut sapaatit akunnerinik 4-nik piffissaliisoqarsimanagera aalajangersakkami taaneqarpoq. Allagaatit piniarneranni Isumaginninnermi Naammagittaalliuuteqartarfiup assigisaanik kommunip aalajangiinera ilanngullugu nassiutissavaa, taamaasilluni allagaatit sopiaat pineqarnersut kommunip paasisinnaassammagu. Sapaatit akunnerinik sisamanik piffissaliussa eqqortinneqanngippat, nassiussinnginnermik suliaq Isumaginninnermi Naammagittaalliuuteqartarfiup Nakkutilliiisoqarfimmut suliaassiissutigisinnaavaa. Nakkutilliiisoqarfik kommuninik nakkutilliiisuvoq, annerpaamillu kingunerititatut kommunalbestyrelsimi ilaasortat pinngitsaaliissumik akililiisitaanernik pisussaaffilersinnaallugit, kommunalbestyrelsip inatsiseqarneq malillugu iliuusissat pisussaaffigisani iliuserinngippagit. Isumaginninnermi Naammagittaalliuuteqartarfimmi piffissap sulianik suliarinninnermut atorneqartup annertuumik annikillinera qulakkeerneqassaaq, kiisalu nutaamik piffissaliinikkut suliat kommunini, Isumaginninnermi Naammagittaalliuuteqartarfimmi imaluunniit Nakkutilliiisoqarfimmi tuaviuunnerusalernissaat innuttaasunut qulakkeerneqassalluni.

§ 11, imm. 4. suliani nukinginnartuni nalinginnaasumik sapaatit akunnerinik 4-nik piffissaliussa saneqqunneqarsinnaavoq. Tamanna assersuutigalugu pisinnaavoq meeqqanut suliaasaqarfimmi sulianik nukinginnartoqartillugu, meeraq pillugu aalajangiinissaq sukkasuumik pisariaqarpat imaluunniit sukkasuumik aalajangiisoqanngippat aalajangiinissap qatangiinnannginnissaa piniarlugu. Taamaattoqartillugu piffissaq killiliussa qalunaaquttap akunnialunnguanik ullualunnguanilluunniit sivisussuseqarsinnaavoq.

Nr. 5-imut

§ 11a: Aalajangersagaq § 11-mik atuuttumik ingerlatitseqqinneruvoq, taannalu malillugu Isumaginninnermi Naammagittaalliuuteqartarfiup siulittaasuata siulittaasutut piginnaatitaaffini Isumaginninnermi Naammagittaalliuuteqartarfiup allattoqarfianut suliaassiissutigisinnaavai. Sinniisoqarnikkut suliani qanoq aalajangiviigineqartussaanerannik qularnaateqanngitsuni suleriaaseq eqaatsoq aaqqissuunneqarsinnaavoq. Sinniisoqarneq siulittaasup feeriarini napparsimaniniluunniit pissutigalugit peqanngiffiini atorneqarsinnaavoq.

§ 2-mut

Nr. 1-imut

Siunnersuummi § 1, nr. 1-imi piffisaliussap allanngortinneqarnissaanut siunnersuutip kingunerisaanik aalajangersagaq naqqinneqarpoq.

Nr. 2-imut

Siunnersuummi § 1, nr. 1-imi piffisaliussap allanngortinneqarnissaanut siunnersuutip kingunerisaanik aalajangersagaq naqqinneqarpoq.

Nr. 3-imut

Siunnersuummi § 1, nr. 1-imi piffisaliussap allanngortinneqarnissaanut siunnersuutip kingunerisaanik aalajangersagaq naqqinneqarpoq.

§ 3-mut

Nr. 1-imut

Siunnersuummi § 1, nr. 1-imi piffisaliussap allanngortinneqarnissaanut siunnersuutip kingunerisaanik aalajangersagaq naqqinneqarpoq.

§ 4-mut

Inatsit ulloq 1. januaari 2018-imi atuutilersinneqassasoq siunnersuutigineqarpoq.